



Número de expediente: 2016/SUBDIREC/000004

Número de rexistro: 2016009369

CONVENIO DE COLABORACIÓN ENTRE O EXCMO. CONCELLO DE PONTEVEDRA E PARROQUIA DE SANTA MARÍA A MAIOR PARA OBRAS DE LIMPEZA E CONSERVACIÓN DAS FACHADAS PRINCIPAL E NORTE DA REAL BASÍLICA DE SANTA MARÍA A MAIOR

Nas dependencias do Concello de Pontevedra, o día 29/06/2016,

REUNIDOS:

Dunha parte, o Excmo. Sr. D. Miguel Anxo Fernández Lores, Alcalde do Concello de Pontevedra, no exercicio das atribucións conferidas pola lexislación do Réxime e Administración Local,

E doutra parte, don Francisco Javier Porro Martínez, co NIF [REDACTED] actuando en nome e representación da entidade ARCEBISPADO DE SANTIAGO DE COMPOSTELA-PARROQUIA DE SANTA MARÍA A MAIOR, con CIF R1500020A, na súa condición de Párroco In Solidum, segundo resulta acreditado na documentación de representación incorporada ao expediente, asegurando a vixencia do seu cargo e das súas facultades para este acto.

Ámbalas dúas partes actúan nas representacións expresadas e recoñécense reciprocamente capacidade bastante para o outorgamento e formalización deste convenio, e a tal efecto,

EXPOÑEN:

I. O artigo 46 da Constitución Española de 1978 establece a obriga dos poderes públicos de garantir a conservación e promover o enriquecemento do patrimonio histórico, cultural, e artístico dos pobos de España e dos bens que o integran, calquera que sexa o seu réxime xurídico e titularidade.

Partindo desta premisa constitucional, os artigos 25 da Lei 7/1985, de 2 de abril, reguladora das bases de réxime local e 80 da Lei 5/1997, do 22 de xullo, de administración local de Galicia establecen que o Municipio, para a xestión dos seus intereses e no ámbito das súas competencias, pode promover actividades e prestar os servizos públicos que contribúan a satisfacer as necesidades e aspiracións da comunidade veciñal, exercendo en todo caso como competencias propias, nos termos da Lexislación do Estado e das Comunidades Autónomas, entre outras materias, nas de protección e xestión do Patrimonio histórico.

II. No mesmo senso, o art. 4.1 da Lei 8/1995 do Patrimonio Cultural da Comunidade Autónoma de Galicia obriga aos Concellos a protexer, defender, realzar e dar a coñecer o valor cultural dos bens integrantes do patrimonio cultural de Galicia que se localicen no seu termo municipal.

Pola súa banda, o artigo 7 da Lei 16/1985, do 25 de xuño, do Patrimonio Histórico Español, dispón que: "Los Ayuntamientos cooperarán con los Organismos competentes para la ejecución de esta Ley en la conservación y custodia del Patrimonio Histórico Español comprendido en su término municipal, adoptando las medidas oportunas para evitar su deterioro".

III. Segundo dispón o artigo XV dos Acordos entre o Estado Español e a Santa Sede, sobre o ensino e asuntos culturais de 3 de xaneiro de 1979, a Igrexa Católica reitera a súa vontade de continuar poñendo ao servizo da sociedade o seu patrimonio histórico, artístico e documental, dispoñéndose neste texto que concertará co Estado as bases para facer efectivos o interese común e a colaboración entre ambas partes, coa fin de preservar, dar a coñecer e catalogar este patrimonio cultural, de facilitar a súa contemplación e estudo, lograr a súa mellor conservación e impedir calquera clase de perda, no marco do artigo 46 da Constitución.

No mesmo senso, a Exposición de motivos da Lei 8/1985, do Patrimonio Cultural de Galicia dispón que a Lei considera á Igrexa Católica depositaria dunha parte importantísima do patrimonio cultural de Galicia e nese senso contempla unha relación de contraprestación mutua coas Administracións públicas galegas, á fin de garantir a responsabilidade do seu coidado e a existencia dos medios necesarios para levalo a cabo. Deste xeito, o artigo 5 da devandita Lei de Patrimonio Cultural prevé





que a Igrexa Católica, propietaria dunha boa parte do patrimonio cultural de Galicia, velará pola protección, conservación, acrecentamento e difusión deste, colaborando a tal fin coa Administración en materia de Patrimonio.

IV. A Igrexa de Santa María a Maior de Pontevedra, monumento emblemático da nosa cidade e parte indispensable da súa paisaxe urbana, foi construída no século XVI, e no ano 1962, por decreto do Papa Juan XXIII pasou a ser Basílica. Hoxe en día, está considerada Ben de Interese Cultural así como Monumento Histórico-Artístico pertencente ao Tesouro Artístico Nacional por decreto do 03/06/1931. Asemade, dito monumento está incluído no Anexo das Normas Complementarias e Subsidiarias do Planeamento Provincial, aprobadas por Orde da Consellería de Ordenación Territorial e Obras Públicas de 3 de abril de 1991, co que consonte á disposición adicional segunda da Lei 8/1985 se inclúe no Inventario Xeral do Patrimonio Cultural de Galicia, polo que se atopa dentro do obxecto das Leis de Patrimonio histórico invocadas.

A titularidade desta Basílica está atribuída ao Arcebispado de Santiago de Compostela, que é o propietario do devandito Templo, situado no ámbito territorial da Parroquia de Santa María a Maior de Pontevedra, entidade que ten recoñecida personalidade xurídica ao abeiro do canon 515 do Código de dereito canónico.

V. Tendo en conta as obrigas das entidades locais en materia de protección do patrimonio histórico e consonte coas competencias que o artigo 25 da Lei 7/1985 atribúe aos municipios, o Concello de Pontevedra debe aproveitar a oportunidade de cooperar no embelecemento exterior da Basílica, pois o seu realce supón salientar a beleza da cidade enteira. Asemade, debemos ter presente que calquera actuación encamiñada á súa mellora contribúe a enfeitar o enclave no que se atopa, no eido do noso casco histórico, que constitúe un dos espazos públicos máis atractivos de Pontevedra. Todo e anteriormente citado acredita o interese público que concorre no desenvolvemento da actividade.

VI. O convenio de colaboración resulta o instrumento xurídico habitual para canalizar as subvencións tramitadas polo procedemento de concesión directa, consonte ao establecido na actualmente vixente Ordenanza xeral municipal de subvencións, aprobada polo Pleno da Corporación na sesión do 17/09/2004 (BOP nº 190 do 30/09/2004), baixo a vixencia da Lei 38/2003, de 17 de novembro, xeral de subvencións e do Regulamento que desenvolve a anterior, aprobado por Real decreto 887/2006, de 17 de novembro, así como da Lei 9/2007 de subvencións de Galicia. A xustificación posterior, para a achega do importe económico, recollerá todas as prescricións sinaladas encamiñadas ao debido control e aplicación dos fondos públicos.

VII. O Arcebispado de Santiago de Compostela é o titular da Basílica de Santa María a Maior, monumento obxecto dos traballos de conservación subvencionados, o que imposibilita a concorrencia con outras entidades, xustificando a imposibilidade de promover unha concorrencia pública da subvención aprobada.

En base a canto antecede e considerando o establecido nos artigos 294 e 310 da Lei de administración local de Galicia, 111 do Real decreto legislativo 781/1986, de 18 de abril, polo que se aproba o texto refundido das disposicións legais vixentes en materia de réxime local, e 88 da Lei 30/1992, de 26 de novembro, de réxime xurídico das administracións públicas e do procedemento administrativo común, as partes intervenientes acordan celebrar o presente *CONVENIO DE COLABORACIÓN*, que se rexerá con suxeición ás seguintes

CLÁUSULAS:

PRIMEIRA.- OBXECTO


É obxecto do presente convenio establecer as condicións reguladoras da subvención directa que se outorga polo Concello de Pontevedra ao ARCEBISPADO DE SANTIAGO DE COMPOSTELA-PARROQUIA DE SANTA MARÍA A MAIOR , NIF R1500020A, para o desenvolvemento e apoio aos gastos derivados pola organización do proxecto:

OBXECTO

A protección, defensa, realce e dar a coñecer o valor cultural dos bens integrantes do patrimonio cultural do noso municipio

ACTIVIDADE SUBVENCIONADA E PERÍODO DE REALIZACIÓN

Obras de limpeza e conservación das fachadas principal e norte da Real Basílica de Santa María a





Maior.


A actividade descrita deberá terse realizado dentro do período comprendido entre 01 de xaneiro de 2016 e 31 de decembro de 2016

A subvención outórgase de conformidade coas disposicións da Lei 38/2003, de 17 de novembro, xeral de subvencións, Real decreto 887/2006, Lei 9/2007, do 13 de xuño, de subvencións de Galicia e da Ordenanza xeral de subvencións do Concello.

SEGUNDA.- IMPORTE DA SUBVENCIÓN

O Concello de Pontevedra comprométese a achegar a cantidade de 8.802,75 €, para colaborar nos gastos derivados da execución do proxecto. O importe subvencionado non poderá exceder do 50% do custe do proxecto.

A achega municipal efectuarase con cargo á partida do orzamento xeral do Concello que se detalla, tendo emitido informe a Intervención Xeral Municipal sobre a existencia de crédito na dita aplicación orzamentaria.



APLICACIÓN	OPERACIÓN CONTABLE	IMPORTE
01.334.0-489.03	2016/32174	8.802,75 €
IMPORTE TOTAL		8.802,75 €

A subvención outorgada polo Concello é compatible con outras axudas, ingresos ou recursos públicos ou privados para a mesma finalidade. Neste caso, na xustificación da subvención deberá de acreditarse o importe, procedencia e aplicacións dos fondos percibidos á actividade subvencionada.

O importe da subvención en ningún caso poderá ser de tal contía que, illadamente ou en concorrencia con subvencións ou axudas doutras administracións públicas ou doutros entes públicos ou privados, supere o custo total da actividade subvencionada.

TERCEIRA.- OBRIGAS DO BENEFICIARIO

A entidade ARCEBISPADO DE SANTIAGO DE COMPOSTELA-PARROQUIA DE SANTA MARIA A MAIOR comprométese a destinar a subvención ao desenvolvemento da actividade descrita e está obrigada a destacar en lugar preeminente a colaboración económica ou patrocinio do Concello de Pontevedra, mediante a colocación dun cartel anunciador no que figure a colaboración económica do Concello. Asemade, a entidade beneficiaria dará publicidade da subvención outorgada tanto nos libros, folletos, carteis, informacións, material e documentación en xeral, así como nos anuncios de difusión da actividade subvencionada.

A entidade beneficiaria ten a condición de organizadora e promotora exclusiva do proxecto subvencionado, limitándose a colaboración do Concello a achega da subvención comprometida. Esta administración está eximida de calquera responsabilidade civil que poida derivarse da realización do evento. Por tanto comprométese a solicitar as autorizacións que, no seu caso, sexan necesarias para o desenvolvemento das actividades. Porá en coñecemento deste Concello as datas e lugares previstos para o desenvolvemento daquelas, cando non resulte preciso a obtención de licenza municipal.

A entidade beneficiaria poderá contratar os gastos que sexan necesarios para a realización por si mesma da actividade subvencionada, pero non poderá subcontratar con terceiros a execución total ou parcial da actividade para a que se outorga a subvención.

Ao abeiro do disposto no artigo 31 da Lei 38/2003 xeral de subvencións, cando o importe do gasto subvencionable contratado pola beneficiaria supere a contía de 12.000,00 €, deberán de solicitarse como mínimo tres ofertas de diferentes provedores. A elección entre as ofertas presentadas, que deberán de achegarse no seu caso na xustificación, realizarase conforme a criterios de eficiencia e economía; no caso de elixir a oferta menos vantaxosa dende o punto de vista económico, deberá de xustificarse esta circunstancia expresamente nunha memoria.

De conformidade co artigo 33 da Ordenanza de impulso do uso do galego no Concello de Pontevedra,





as publicacións, a cartelaría, a publicidade e toda produción escrita das actividades da asociación beneficiaria da subvención deberá estar en lingua galega.

CUARTA.- COMPROBACIÓN DAS SUBVENCIONES

Para o seguimento das actuacións previstas e a solución de calquera controversia que xurda en canto á interpretación dos termos do presente convenio, constitúese unha Comisión de Seguimento integrada polo Alcalde ou Concelleiro/a no que delegue e o representante da entidade beneficiaria.

No exercicio das funcións de fiscalización e control do destino dos fondos públicos a entidade beneficiaria facilitará canta información lle sexa requirida polo Tribunal de Cuentas e polo Consello de Contas de Galicia. Neste senso, a súa actuación estará sometida á esixencia de responsabilidade contable nos termos e co alcance que determine, no seu caso, o axuízamento dos anteriores órganos.

QUINTA.- GASTO SUBVENCIONABLE

Consideraranse gastos subvencionables aqueles que de maneira indubidable respondan á natureza da actividade subvencionada e se realicen con anterioridade á finalización do período de xustificación.

Serán subvencionables os gastos de redacción do proxecto e obras, así como os de honorarios do director da obra.

Os tributos son gastos subvencionables cando o beneficiario da subvención os abona efectivamente.

Non son subvencionables os impostos persoais sobre a renda nin os tributos satisfeitos ao Concello de Pontevedra.

O IVE soportado, que deberá de constar desglosado, será subvencionable cando o beneficiario non poida deducilo, recuperalo ou compensalo.

Os custes indirectos imputaranse á actividade subvencionada na parte que razoablemente corresponda e na medida en que estean relacionados de maneira indubitada e se realicen no período no que se desenvolva a actividade.

SEXTA.- XUSTIFICACIÓN DA SUBVENCIÓN

1.- A entidade beneficiaria está obrigada a presentar no rexistro xeral do Concello a conta xustificativa da subvención no prazo de 3 meses dende o remate da actividade.

En todo caso o prazo máximo para presentar esa xustificación será o de 31 de marzo de 2017.

2.- O tipo de xustificación será conta xustificativa con achega de xustificantes de gasto adaptada ao disposto no presente convenio.

A documentación a presentar será a seguinte:

Memoria detallada da actividade subvencionada que deberá estar asinada.

Xustificación documental do gasto: facturas ou demais documentos de valor probatorio equivalente (deberase achegar o orixinal e unha copia de cada unha das facturas e/ou outros documentos que se presenten).

No seu caso, un exemplar da documentación que acredite o financiamento da actividade polo Concello de Pontevedra (folletos, dípticos, carteis, etc.).

Certificacións de estar ao corrente coa Tesourería Xeral da Seguridade Social, coa Axencia Estatal Tributaria e coa Consellería de Economía e Facenda.

Relación total de ingresos da actividade subvencionada.

Relación total de gastos da actividade subvencionada (con indicación das facturas ou dos documentos xustificativos do gasto).

As facturas xustificativas da subvención deberán cumprir os requisitos establecidos no Regulamento polo que se regulan as obrigas de facturación, aprobado polo Real Decreto 1619/2012, estarán datadas no período subvencionable e conterán o selo de pagado ou xustificación documental que





acredite o seu pago. Deberá achegarse pola beneficiaria a xustificación documental do pago, e no caso de que esta non poida presentarse coa conta xustificativa deberá de acreditarse o pagamento no prazo de 10 días dende o abono da subvención pola Tesourería Municipal, ao abeiro do establecido no artigo 18.2 da Ordenanza xeral de subvencións do Concello.

Así mesmo, segundo a Lei 7/2012 de 29 de outubro, non poderán pagarse en efectivo as operacións de importe igual ou superior a 2.500,00 €, polo que, o pagamento destas operacións acreditarase co correspondente xustificante da transferencia bancaria.

A presentación da conta xustificativa fóra do prazo indicado constitúe unha infracción leve por incumprir as obrigas recollidas na normativa reguladora das subvencións públicas, que dará lugar á imposición das sancións legalmente previstas.

SÉTIMA.- VIXENCIA

O presente convenio de colaboración entrará en vigor no intre da súa sinatura e terá unha vixencia limitada ao período comprendido entre 1 de xaneiro de 2016 e 31 de decembro de 2016, polo que as actividades e xustificacións dos gastos terán que referirse ao ano como período completo.

Serán causas de extinción deste Convenio a realización do seu obxecto, así como o incumprimento total ou parcial de calquera das súas cláusulas, mediando neste caso denuncia previa das partes asinantes.

OITAVA.- POSIBILIDADE DE ANTICIPO

Non procederá a concesión de anticipo ningún.

NOVENA.- LEXISLACIÓN APLICABLE E XURISDICIÓN COMPETENTE

O presente convenio ten natureza administrativa, rexéndose polas súas cláusulas, pola Lei 38/2003, de 17 de novembro, xeral de subvencións, polo RD 887/2006, de 21 de xullo, polo que se aproba o Regulamento da Lei xeral de subvencións, pola Lei 9/2007, de 13 de xuño, de subvencións de Galicia e demais normativa vixente que lle resulte de aplicación.

As partes asinantes comprométense a resolver de maneira amigable calquera desacordo que poida xurdir no desenvolvemento deste convenio. Con todo, e no caso de aparición de discrepancias que non puideran solventarse a través da Comisión de Seguimento, será competente a Xurisdición Contencioso-Administrativa.

En proba de conformidade, as partes subscriben e asinan o presente convenio, por duplicado exemplar e a un só efecto, no lugar e data ao principio indicados, quedando un exemplar en poder de cada unha delas.



Miguel A. Fernández Lores

O alcalde

O secretario da Admón. Municipal



José C. Castiñeira Piñeiro

O Párroco In Solidum
Parroquia de Santa María a Maior

Francisco Javier Porro Martínez